

U decembru 2014.g., Udruženje Ekotim pokrenulo je tužbu protiv Federalnog ministarstva okoliša i turizma, kojom je tražilo poništavanje dopunskog rješenja o graničnim vrijednostima emisije iz TE Banovići. Pošto ovo nije prvi put da se pri izdavanju okolinske dozvole ovom ministarstvu potkradu namjerne ili slučajne greške, Ekotim je iskoristio mogućnost da pravnim putem iste ispravi, i pokrenuo je tužbu protiv Ministarstva. Kao odgovor na tužbu, Ministarstvo je obavijestilo nadležni sud da je poništilo dopunsko rješenje, čime je potvrđeno da je pri izdavanju spornog rješenja došlo do pogrešnog tumačenja i primjene aktuelnih zakona i pravilnika. Važno je istaknuti da su predstavnici Ministarstva koji su pripremali sporno rješenje pogrešno tumačili pravilnik koji je donijelo i usvojilo upravo to ministarstvo.

Naša dosadašnja iskustva u radu s ovim ministarstvom su pokazala da se primjedbe nevladinih organizacija rijetko ili nikako ne uzimaju u obzir, obično uz obrazloženje kako su dozvole profesionalno urađene na osnovu studija o uticaju na okoliš koje su pripremale eminentne institucije. I pored toga što su nevladine organizacije u mnogo slučajeva, dostavljanjem komentara i učešćem na javnim raspravama, dokazale da je kvalitet ovih studija i dozvola upitan, rijetki su projekti za koje ovo ministarstvo nije izdalo okolinsku dozvolu.

Pošto je Rješenjem Kantonalnog suda u Sarajevu, potvrđeno da je udruženje „Ekotim“ bilo u pravu kada je pokrenulo tužbu protiv Ministarstva zbog nepravilnog dopunskog rješenja za okolinsku dozvolu za TE Banovići i na taj način primoralo Ministarstvo da ga poništi, ovaj način uticaja nevladinih organizacija na pogrešan rad Ministarstva pokazao se izuzetno efikasnim.

Činjenica je da svi mi svojim zdravljem plaćamo danak za korištenje prevaziđenih tehnologija i prljavih industrija za koje je Federalno ministarstvo za okoliš izdalo pozitivne okolinske dozvole, tako da se postavlja pitanje koga štiti ovo ministarstvo - okoliš i zdravlje građana Bosne i Hercegovine ili interese probranih „investitora“?

Izvor; Ekotim